



దరతి చుండసి

కే. అంజనతి



శాంతి కుటుంబ వాణిజ్య అకాడమి

జ్యోత్సనాగార కుటుంబకళలు

'TULU SHORT STORIES FOR CHILDREN' SERIES

PARATHI MANGANE by K. Leelavathi.


Published by Karnataka Tulu Sahitya Academy, Corporation Building, Lalbhag, Mangalore - 575003.

ಪ್ರಥಮ ಮುದ್ರಣ	:	1998	BVP-1681 10/10/12 G-2329 69/84.
ಬೆಲೆ	:	ರೂ. 15	
ಪುಟಗಳು	:	20	
ಪ್ರಧಾನ ಸಂಪಾದಕ	:	ಡಾ. ಬಿ.ಎ. ವಿವೇಕ ರೈ ಅಧ್ಯಕ್ಷರು ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ	
ಪ್ರಕಾಶಕರು	:	ಡಾ. ಪಾಲ್ವಾಡಿ ರಾಮಕೃಷ್ಣ ಆಚಾರ್ ರಿಜಿಸ್ಟ್ರಾರ್ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ	
ಹಕ್ಕುಗಳು	:	ಅಕಾಡೆಮಿ	
ಅಕ್ಷರ ಸಂಯೋಜನೆ	:	ಆಕೃತಿ ಕಂಪ್ಯೂಟರ್ಸ್, ಮೈದಾನ 4ನೇ ಅಡ್ಡರಸ್ತೆ, ಮಂಗಳೂರು - 575001	
ಮುದ್ರಣ	:	ಪ್ರಕಾಶ್ ಆಫ್‌ಸೆಟ್ ಪ್ರಿಂಟರ್ಸ್, ಬೈಕಂಪಾಡಿ ಕೈಗಾರಿಕಾ ಪ್ರದೇಶ, ನವ ಮಂಗಳೂರು - 575010	

ಜೋಕುಲೆಗಾದ್ ತುಳು ಕತೆಕುಲು - 4

ಪರತಿ ಮಂಗಣೆ

ಕೆ. ಲೀಲಾವತಿ



ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ
ಲಾಲ್‌ಬಾಗ್, ಮಂಗಳೂರು - 575003.

ಅಧ್ಯಕ್ಷರೇನ ಮದಿಪು

ತುಳುನಾಡ್ಡ್ ಪ್ರಾಕ್ಡ್‌ದಿಂಚಿ ನಮ್ಮ ಹಿರಿಯಾಕುಲು ಪಂಡೊಂದು ಬತ್ತಿಂಚಿ ಅಜ್ಜಿ ಕತೆಕುಲು, ಪಾಡ್ಡನದ ಕತೆಕುಲು ಒಂಜಿ ಕಾಲೊಡು ನಮ್ಮ ತುಳುವೆರೆಗ್ ಅಕ್ಲ್ ಚರಿತ್ರನ್ ತೆರಿಪಾಯಿನ ಕಲ್ಪಾಯಿನ ವಿದ್ಯೆಲು. ಕೋಟಿ ಚಿನ್ನಯೆರ್, ಸಿರಿ, ಅಬ್ಬಗೆ ದಾರಗೆ, ದೇವು ಪೂಂಚೆ, ಅಗೋಳಿ ಮಂಜಣೆ, ಪುಳ್ಕೂರು ಬಾಚೆ, ಪರತಿ ಮಂಗಣೆ ಇಂಚ ಏತೇತೋ ಆಂಜೊವು ಪೊಂಜೊವೆಲೆನ ಪುದರಾಲೆನ್ ಕತೆಕಾಲೆನ್ ನಮ್ಮ ಹಿರಿಯಾಕುಲು ಕೇಂಡೊಂದು ಕಲ್ತೊಂದು ಮಲ್ಲೆ ಆತೆರ್. ಒಂಜಿ ಕಾಲದ ಅಜ್ಜಿ ಅಜ್ಜೆರ್ಕುಲು ಪುಳ್ಳೆಲ್ಗೆ ಪನ್ನೊಂದಿತ್ತಿನ ಕತೆಕ್ಲೆಡ್ ಕುಸಾಲ್ ಇತ್ತಂಡ್, ಕುಸೆಲ್ ಇತ್ತಂಡ್. ಕನಕಟ್ಟುನ, ಗೇನ ಪುಟ್ಟಾವುನ ಶಕ್ತಿ ಇತ್ತಂಡ್. ತೆಲ್ತ್ ತೆಲ್ತ್ ಬಂಜಿ ಉರ್ಕಾವುನ ಉಲ್ಲಾಸ ಇತ್ತಂಡ್. ಇಂಚ ತೆಲಿಪುನ ಯೋಚನೆ ಮಲ್ಪುನ ಪೊಸ ಲೋಕೊಗು ಪೋಪುನ, ಪೊಸ ಸಾದಿ ಪತ್ತುನ, ಪೊಸ ವಿದ್ಯೆಲೆನ್ ತುಳುವೆರ್ ಕಲ್ತಾದಾನೆ ಅಕ್ಲೆನ ಅಜ್ಜಿ ಕತೆಕ್ಲೆಡ್ ಇಂಚಿತ್ತಿ ಅಜ್ಜಿ ಕತೆಕ್ಲೆ, ಪಾಡ್ಡನದ ಕತೆಕ್ಲೆ ರುಚಿನ್ ನಮ್ಮ ಪೊಸ ಕಾಲದ ತುಳುವ ಜೋಕ್ಲೆಗ್ ಪುಟ್ಟವೊಡು ಪನ್ನಿ ಆಸೆ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದವು. ಅಂಚಾದ್ ಈ 20 ತುಳು ಕತೆ ಬೂಕುಲೆನ್ ತುಳು ಸಾಹಿತಿಲೆಡ ಬರೆಪಾದ್ ಕತೆಕಾಲೆಗ್ ಬೋಡಾಪಿನ ಚಿತ್ರೊಲೆನ್ ಸೇರ್ಪಾದ್ ಬೂಕುಲೆ ಮೋನೆಲೆಗ್ ರಂಗ್ ಪಾಡ್ಪಾದ್ ತುಳು ಜೋಕುಲೆ ಮಟ್ಟೆಲ್ಗೆ ಪಾಡೊಂದುಂಡು.

ತುಳು ಸಾಹಿತ್ಯ ಅಕಾಡೆಮಿ 1994ಟ್ ಈ ಕತೆ ಬೂಕುಲೆನ್ ಬರೆಪವುನ ಯೋಚನೆ ಮಲ್ತಾದ್ ದಕ್ಷಿಣ ಕನ್ನಡ ಜಿಲ್ಲಾ ಪಂಚಾಯತ್‌ದೊಟ್ಟಿಗೆ ಸೇರ್ಪಾದ್ ಅಜ್ಜಿ ಮಲ್ಪುನ ಯೋಜನೆ ಇತ್ತಂಡ್. 20 ಜನ ಸಾಹಿತಿಲೆಕುಲು ಅಕಾಡೆಮಿಡ್ ಸೇರ್ಪೆ ಚರ್ಚೆ ಮಲ್ತಾದ್ ಈ ಬೂಕುಲೆನ್ ಬರೆದ್ ಕೊರ್ಪೆರ್. ಬೇತೆ ಬೇತೆ ಕಲಾವಿದೆರ್ಕುಲು ಈ ಬೂಕುಲ್ ಮೋನೆದ ಚಿತ್ರೊಲೆನ್ ಉಳಯಿದ ಚಿತ್ರೊಲೆನ್ ಬರೆದ್ ಕೊರ್ಪೆರ್. ಆಂಡ 1995ಟ್ ತುಳು ಸಾಹಿತ್ಯ ಅಕಾಡೆಮಿ ಅಸ್ತಿತ್ವೊಡು ಇಜ್ಜಂದಿನೆಡ್ಡಾದಾಲಾ, 1996ಟ್ ಅಕಾಡೆಮಿಗ್ ಪೊಸ ಜುವ ಕೊರ್ನಗ ಜಿಲ್ಲಾ ಪಂಚಾಯತ್‌ದ ಯೋಜನೆ ಉಂತುದು ಪೋಯಿನೆಡ್ಡಾದಾಲಾ ಬೊಕ್ಕ ಅಕಾಡೆಮಿದ ಪಣವುದ ತಾಪತ್ರಯೊಲೆಡ್ಡಾದಾಲಾ ಈ 20 ಬೂಕುಲೆನ್ ಅಜ್ಜಿ ಮಲ್ಪುನ ಕೆಲಸೊ ದುಂಬು ದುಂಬೆ ಪೋಂಡು. ಆಂಡ ಇತ್ತೆ ಎಂಚಲಾ ಮನಸ್ ಮಲ್ತಾದ್ ಈ ಎಡ್ಡೆ ಕೆಲಸೊನು ಕೋಡಿ ಎತ್ತವೊಡುಂದು ತುಳು ಸಾಹಿತ್ಯ ಅಕಾಡೆಮಿ ಈ 20 ಬೂಕುಲೆನ್ ಅಜ್ಜಿ ಮಲ್ತೊಂದುಂಡು.

ಈ ಬೂಕುಲೆನ್ ಬರೆದ್ ಕೊರ್ಪುನ ಮಾತ ತುಳು ಸಾಹಿತಿಲೆನ್ಲಾ, ಅವೆಕ್ ಚಿತ್ರ ಬರೆದ್ ಕೊರ್ಪಿ ಕಲಾವಿದೆರ್ನ್ಲಾ ಅಕಾಡೆಮಿ ಮೋಕೆಡ್ ನೆನೆತೊಂದುಂಡು. ಉಂದೆಟ್ ಪರತಿ ಮಂಗಣೆ ಕತೆ ಬೂಕುನು ಪೂರ್ವುಡು ಮೊಡೆದ್ ಕೊರಿನ ಕೆ. ಲೀಲಾವತಿ ಮೆರೆಗ್ ಅಕಾಡೆಮಿದ ಪುದರಾಡ್ ಸೊಲ್ತೆ ಸಂದಾವೊಂದುಲ್ಲೆ. ಈ ಬೂಕುಗು ಅಕ್ಷರ ಜೋಡಣೆ ಮಲ್ತ್ ಕೊರಿನ ಆಕೃತಿ ಕಂಪ್ಯೂಟರ್‌ದ ಕಲ್ಲೂರು ನಾಗೇಶ್ ಬೊಕ್ಕ ನಳಿನಿ ಸುವರ್ಣ ಮೊಕ್ಲೆಗ್ಲಾ, ಕಡಮೆ ಕಾಲೊಡು ಪೂರ್ವು ಪೊಲಿಗಡ್ ಅಜ್ಜಿ ಮಲ್ತ್ ಕೊರಿನ ಪ್ರಕಾಶ್ ಆಫ್‌ಸೆಟ್ ಬೈಕಂಪಾಡಿ ಇಂದೆತ್ತ ದನಿ ಕೆ.ಎಂ. ಶಂಕರ ಪ್ರಭು, ಮೇನೇಜರ್ ಶ್ರೀನಿವಾಸ ರಾಯೆರ್ ಸಹಾಯೊನು ಅಕಾಡೆಮಿ ಏಪಲಾ ನೆನೆತೊನುಂಡು. ಮಂಗಳೂರು

16.3.1998

ಪ್ರೊ. ಬಿ.ಎ. ವಿವೇಕ ರೈ

ಪರತಿ ಮಂಗಳೆ

ಬಯ್ಯದ ಪೂರ್ತು. ರಾಮಕ್ಕ ಬೊಕ್ಕ ಸೀತಕ್ಕ ನೀರ್ ಕೊನಯರೆ ಗುವೆಲ್ದಡೆ ಬರ್ಪೆರ್.

ಸೀತಕ್ಕ : ದಾನೆ ರಾಮಕ್ಕ ಬಯ್ಯದ ಅಟಲ್ ಆಂಡ?

ರಾಮಕ್ಕ : ಅಟಲ್ ಆಂಡ್. ರಡ್ಡ್ ಕೊಡಪಾನ ನೀರ್ ಕೊನಕ ಪಂಡ್‌ದ್ ಬತ್ತೆ.

ಸೀತಕ್ಕ : ದಾನೆ ಇನಿ ಈತ್ ಬೇಗ ಅಟಲ್?

ರಾಮಕ್ಕ : ಇನಿ ಮೈದಾನ್‌ಡ್ ಒಂಜಿ ಆಟ ಉಂಡು. ಬಾರಿ ಪೂರ್ತು ಆಟ. ಇನಿ ಒಂಜಿ ಆಟ ತೂಕ ಪಂಡ್‌ದ್ ಉಂಡು.

ಸೀತಕ್ಕ : ನಿಕ್ಕ ಬಾರಿ ಆಟದ ಮರ್ಲತ್ತ? ದುಂಬು ಒಂಜೇ ಒಂಜಿ ಆಟ ಬುಡಂದೆ ತೂವೊಂದಿತ್ತ.

ರಾಮಕ್ಕ : ನಿಕ್ಕಲಾ ಆಟದ ಮರ್ಲ್ ದಾಲ ಕಮ್ಮಿಜ್ಜಿ.

ಸೀತಕ್ಕ : ದುಂಬು ಓಲು ಆಟ ಇತ್ಂಡ ಯಾನ್‌ಲಾ ಬಲ್ಲೊಂದಿತ್ತೆ. ಇತ್ತೆ ರಾತ್ರೆಯಿಡೀ ನಿದ್ರೆ ಕಜ್ಜೆರೆ ಆಪುಜಪ್ಪ.

ರಾಮಕ್ಕ : ಇನಿತ ಆಟಬಾರಿ ಎಡ್ಡೆ ಆಟಗೆ. ಈಲಾ ಬರ್ಪೆನಾ?

- ಸೀತಕ್ಕ : ಬರಿಯರೆ ಮನಸ್ಸುಂಡೆ. ಆಂಡ ನಿದ್ರೆ ಕಜ್ಜೆರುನು ಎಂಚ ಪಂಡ್‌ದ್. ಅವ್ವಂದೇ ದಾದ ಪರ್‌ಸಂಗಗೆ?
- ರಾಮಕ್ಕ : ಪರತಿ ಮಂಗಣೆಗೆ.
- ಸೀತಕ್ಕ : ಪರತಿ ಮಂಗಣೆನಾ? ಅವು ಎಂಚಿನ ಆಟಪ್ಪ? ಯಾನ್ ಈತನೆಟ್ಟು ಆ ಪುದರೇ ಕೇಂಡ್‌ದ್‌ಜಿ.
- ರಾಮಕ್ಕ : ಐಕೆ ಯಾನ್ ಪೋಯಿ ಪಂಡಿನಿ.
- ಸೀತಕ್ಕ : ಕತೆ ದಾದ? ನಿಕ್ಕು ಗೊತ್ತುಂಡ?
- ರಾಮಕ್ಕ : ಎಂಕ್ ಗೊತ್ತುಜ್ಜಿ. ಪಾಡ್ಡನದ ಕತೆಕುಲು ಮಾತಾ ಸೇಸಕ್ಕುಗ್ ಗೊತ್ತು. ಅಲೆಡ ಕೇನ್‌ಂಡ ಆವು.
- ಸೀತಕ್ಕ : ಒಲ. ಸೇಸಕ್ಕುಗ್ ನೂದು ವರ್ಸ ಅವುಸ. ಆಲ್ ನೀರ್‌ಗ್ ಬರೊಂದುಲ್ಲಲ್. ಅಲೆಡನೇ ಕೇನ್‌ಗ.
- ಸೇಸಕ್ಕ : ದಾನೆಗೆ? ರಾಮಕ್ಕ ಬೊಕ್ಕ ಸೀತಕ್ಕನ ಬಾರಿ ಪಟ್ಟಾಂಗ ಆವೊಂದುಂಡು?
- ರಾಕ್ಕ : ದಾಲಜ್ಜಿ. ಇನಿ ಒಂಜಿ ಆಟ ಉಂಡತ್ತ? ಐಕ್ ಬರ್ಪನಾ ಪಂಡ್‌ದ್ ಸೀತಕ್ಕಡ ಕೇನೊಂದಿತ್ತೆ.
- ಸೇಸಕ್ಕ : ವಾ ಪರ್ಸಂಗಗೆ?
- ರಾಮಕ್ಕ : ಪರತಿ ಮಂಗಣೆಗೆ.
- ಸೇಸಕ್ಕ : ಪರತಿ ಮಂಗಣೆನಾ. ಬಾರಿ ಪೂರ್ಲುದ ಆಟ ಅವು. ಯಾನ್ ದುಂಬೇ ತೂತೆ.
- ಸೀತಕ್ಕ : ಅಂದಯ. ಸೇಸಕ್ಕ. ಐತ ಕತೆ ಪನ್ನನ.
- ಸೇಸಕ್ಕ : ನಿಕುಲು ಆಟ ತೂಪರ್‌ಗೆ. ಯಾನ್ ದುಂಬೇ ಕತೆ ದಾಯೆ ಪನ್ನಿನಿ?
- ರಾಮಕ್ಕ : ಕತೆ ದುಂಬೇ ಗೊತ್ತಿತ್ತಂಡ ಆಟ ಬೊಕ್ಕಲಾ ಬಾರಿ ರಂಗಾಪುಂಡು. ಪನ್‌ಯ ಕತೆ.
- ಸೇಸಕ್ಕ : ನಿಕ್‌ಲೆಗ್ ಕೇನೊಡೇ ಪಂಡ್‌ದಿತ್ತಂಡ ಪನ್ನ. ಐಕ್ ದಾನೆ ಆವೊಡು.
- ಸೀತಕ್ಕ : ಪರತಿ ಮಂಗಣೆ ಪಂಡ್‌ಂಡ ಆಲ್ ಬಾರಿ ಮಂಗಣೆದಾಲೆ ಆದುಪ್ಪೊಡು ಅತ್ತಾ?
- ಸೇಸಕ್ಕ : ಅತ್ತಪ್ಪ. ಅಲೆನ ಪುದರ್ ಮಂಗಣೆ ಆತೆ. ಆಲ್ ಬಾರಿ ಪೂರ್ಲಕಂಟಾದ ಪೊಣ್ಣು. ಬಾರಿ ಗರತಿ.
- ರಾಮಕ್ಕ : ಪರತಿ ಮಂಗಣೆ ಪಾಡ್ಡನಲಾ ಉಪ್ಪೊಡತ್ತ?
- ಸೇಸಕ್ಕ : ಅಂದ್. ಆ ಪಾಡ್ಡನೊನು 'ಪರತಿ ಮಂಗಣೆ ಸಂದಿ' ಪಂಡ್‌ದಾಲಾ 'ಬೊಟ್ಟುಪ್ಪಾಡಿ ಬಲ್ಲಾಳೆ ಸಂದಿ' ಪಂಡ್‌ದಾಲಾ ಪನ್ನರ್.
- ಸೀತಕ್ಕ : ಈ ಕತೆ ಪನ್. ಕತೆ ಕೇಂಡ್‌ದ್ ಕುಸಿ ಆಂಡ ಎಂಕ್‌ಲಾ ಆಟ ತೂವೊಡು.
- ರಾಮಕ್ಕ : ಬಲೆ. ಮೂಲೇ ಕಲ್ಲದ ಮಿತ್ತ್ ಕುಲ್ಲುಗ.

ಸೇಸಕ್ಕ : ಬೊಟ್ಟಪ್ಪಾಡಿ ಪನ್ನಿನ ಪುದರಾದ ಬೂಡು. ಆ ಬೂಡುದ ಯಜಮಾನೆ ಬಲ್ಲಾಳೆ ಬಾರಿ ರಸಿಕೆ. ಒಂಜಿ ದಿನ ಪುಲ್ಲಕಾಂಡೆ ಬಲ್ಲಾಳೆ ಆಯನ ಕೆಲಸದಯನ ಒಟ್ಟಿಗೆ ನೀರ್ ಕಟ್ಟೆರೆ ಕಂಡೊಗು ಬರ್ಪೆ. ಸೊರ್ಕಿನ ನೀರ್‌ನ್ ಸರ್ಕಾವೆ. ಸರ್ಕಿನ ನೀರ್‌ನ್ ಸೊರ್ಕಾವೆ. ಕಾರಾಡ್ ಜೋಡು; ಕೈಟ್ ಬೊಳ್ಳಿಕಟ್ಟಾದ ಬೆತ್ತ. ಅಂಗಿದ ಬಂಗಾರ್ಡ್ ಗುಬ್ಬಿ ದೊಂಬುಗು ಮಿರಿ ಮಿರಿ ಮಿಂಚುಂಡು. ನಾಲ್ ಬಿರೆಲ್‌ಡ್ ಬಂಗಾರ್ಡ್ ಉಂಗಿಲ. ಗುತ್ತದ ಗತ್ತಡ್ ತರೆ ದೆರ್ತಾದ್ ಬರೊಂದುಲ್ಲೆ. ಬಚ್ಚೆರೆ ಅಗ್ಗಿದ್ ಕೆಂಪಾಯಿನ ದುಡಿ. ಅಲ್ಲಲ್ಪ ಉಂತುದು ಕೆಲಸದಾಯಡ ಕೆಲಸ ಮಲ್ಪಾವೆ. ಕಟ್ಟಪುಣಿತ ಮಿತ್ತ್ ದುಂಬೊತ್ತುದು ಪೋಪೆ. ಕಟ್ಟಪುಣಿತ ಮಿತ್ತ್ ಒಂತೆ ಎತ್ತರದ ಗುಡ್ಡೆ. ಗುಡ್ಡೆದ ಬರಿಟೊಂಜಿ ಮುಳಿತ ಕೊಟ್ಟೆ. ಕೊಟ್ಟೆದ ಎದುರು ಪೆಲತ ಕಟ್ಟೆ. ಆ ಪೆಲತ ಕಟ್ಟೆಡ್ ಒಂಜಿ ಪೊಣ್ಣು ಕುಲೊಂದುಲ್ಲಲ್. ಕಾಂಡೆದ ನೈ ದೊಂಬುಗು ಮೈ ಒಡ್ಡುದು ಕುಲ್ಲಲ್. ಜವಂದಿ ಪೊಣ್ಣು. ಮೊರಂಪು ಮುಟ್ಟುನ ತರೆಕುಜಲ್‌ನ್ ಬೆರಿ ನಿಲಿಕೆ ಬುಡ್ಡಾದಲ್. ಸೂರ್ಯೆ ದೇವರೆ ಬೊಲ್ಪು ಅಲೆನ ಮೋನೆಗ್ ಬೂರೊಂದುಂಡು. ಬಲ್ಲಾಳೆ ಒಂಜಿ ನಿಮಿಷ ಉಂತಿಯೆ. ಈತ್ ಪೂರ್ಲಕಂಟ್‌ದ ಪೊಣ್ಣು ಏರಾದುಪ್ಪು? ಬಲ್ಲಾಳೆಗ್ ಆಚಿರ. ತನ್ನ ಕಣ್ಣೆಗ್ ಈತ್ ನೆಟ್ಟು ಬೂರಂದಿನ ಈ ಪೊಣ್ಣು ಏರ್? ಪಿರ ತೂಪೆ. ಕೆಲಸದಾಯೆ ಬರೊಂದುಲ್ಲೆ. "ಅಂದಯ ಪೆಲತ ಕಟ್ಟೆಡ್ ಕುಲ್ಲುದಿನ ಆ ಪೂರ್ಲ ಪೊಣ್ಣು ಏರ್?" ಬಲ್ಲಾಳೆ ಕೇನುವೆ.

"ಅವು ಪರವೆ ಮೈಂದನ ಬೊಡೆದಿ ಪರತಿ ಮಂಗಣೆ ಅತ್ತೆ?" ಪನ್ನೆ ಕೆಲಸದಾಯೆ.

ಬಲ್ಲಾಳನ ಶರೀರೊಡು ಮಿಂಚಿ ಪರತಿಲೆಕ್ಕ ಆಂಡ್. ಅಲೆನ ಪೂರ್ಲಗು ಆಯನ ಮತಿಯೇ ಕೆಟ್ಟಾಂಡ್. 'ಈ ಪೊಣ್ಣುನ್ ಎಂಚಾಂಡಲ ಯಾನ್ ಪಡೆವೊಡು' ಪನ್ನಿನ ದುರಾಸೆ ಆಯನ ಮನಸ್ಸೆಡ್ ಪುಟ್ಟುಂಡು. ಪರತಿ ಮಂಗಣೆ ಎನ್ನಾಲ್ ಆವೊಡು. ಇಜ್ಜಂಡ ಈ ಬದ್‌ಕೆಗ್ ಅರ್ಥ ಇಜ್ಜಿ ಪಂಡ್‌ದ್ ತೋಜಿಂಡ್.

ಬಲ್ಲಾಳೆ ಕೆಲಸದಾಯನ್ ಕೈತಲ್ ಲೆತ್ತೆ. 'ಈ ದುಂಬು ಪೋಲ. ಎಂಕ್ ಒಂತೆ ಕೆಲಸ ಉಂಡು. ಯಾನ್ ಪಿರವುಡೆ ಬರ್ಪೆ' ಪಂಡೆ. ಕೆಲಸದಾಯೆ ಅವು ಪಂಡೆ. ದುಂಬು ಪೋಯೆ.

ಸೀತಕ್ಕ : ಬಲ್ಲಾಳನ ದಿಟ್ಟಿ ಬೂರಿ ಬೊಕ್ಕ ಆ ಪೊಣ್ಣು ಬದ್‌ಕೆರುಂಡ?

ರಾಮಕ್ಕ : ಅವುಲಾ ಆಲ್ ಪರತಿ ಪೊಣ್ಣು.

ಸೀತಕ್ಕ : ಬಲ್ಲಾಳನ ಐಸಿರೊಗು ಆಲ್ ಮರ್ಲಾಯೆರೆಲಾ ಯಾವು ಅತ್ತೆ?

ಸೇಸಕ್ಕ : ಛಿ ಛಿ! ದಾದ ಪನ್ನಯ ಸೀತಕ್ಕ? ಅಂಚಿನ ಪೊಣ್ಣು ಆಲತ್.

- ರಾಮಕ್ಕ : ಆಯೆ ಬೂಡುದ ಬಲ್ಲಾಳೆ. ಅಯನ್ ಎದುರು ಪಾಡುನ ತಾಕತ್ತ್ ಮೊಲೆಗ್ ಉಪ್ಪುವಾ?
- ಸೇಸಕ್ಕ : ಏತೋ ಪಾಡ್ಡನೊಡು ಪೊಣ್ಣು ತನ್ನ ಧೈರ್ಯ ತೂಪಾಯಿನ ಕತೆ ಉಂಡು. ಮಲ್ಲ ಮಲ್ಲ ಗುತ್ತುದಕಾಲೆನ ಅಹಂಕಾರೊನು ತೂರ್ತುದು ಮಣ್ಣ್ ಮುಕ್ಕಾಯಿನ ಪೊಣ್ಣುಲುಲಾ ಉಲ್ಲೆರ್.
- ರಾಮಕ್ಕ : ಅವ್ವಂದೆ. ಬೊಕ್ಕ ದಾನೆ ಆಂಡ್? ಬಲ್ಲಾಳೆ ಪರತಿ ಮಂಗಣೆನ ಕೈತಲ್ ಪೋಪೆನಾ?
- ಸೇಸಕ್ಕ : ಅಂದ್. ಕೆಲಸದಾಯನ್ ಕಡಪುಡಿಯೆನಾ? ತಾನ್ ಸೀದಾ ಪೆಲತ ಕಟ್ಟಿದ ಕಡೆಗ್ ಬರ್ಪೆ.

ತನ್ನ ಕಡೆಕ್ ಬರ್ಪಿನ ಬಲ್ಲಾಳನ್ ಪರತಿ ಮಂಗಣೆ ತೂಪಲ್. ದಿಡ್ಡಕ್ಕ ಲಕ್ಕದ್ ಕೊಟ್ಟಿದ ಉಲಯಿ ಪೋಪಲ್. ಬಾಕಿಲ್ ಪಾಡುವಲ್. ಬಲ್ಲಾಳೆ ಅಲೆನ ಬೆರಿಯೆ ಪೋಪೆ. ಕೊಟ್ಟಿದ ಪಿದಯಿ ಉಂತುವೆ.

"ಬಾಕಿಲ್ ದೆಪ್ಪು ಮಂಗಣೆ" ಪನ್ನೆ.

"ಎನ್ನ ಪರವೆ ಇಲ್ಲಡಿಜ್ಜೆ. ಯಾನ್ ಬಾಕಿಲ್ ದೆಪ್ಪಯೆ" ಪನ್ನಲ್ ಮಂಗಣೆ.

"ನಿನ್ನ ಪರವೆ ಓಡೆ ಪೋತೆ?" ಕೇನುವೆ ಬಲ್ಲಾಳೆ.

"ಆಯೆ ಪರ್ಮಲೆದಂಚಿ ಪಾಲೆದ ನಾಟೊಗು ಪೋತೆ" ಪನ್ನಲ್ ಮಂಗಣೆ.

ಬಲ್ಲಾಳೆ ಒಂತೆ ಪೂರ್ತು ಕಾಪುವೆ. ಮಂಗಣೆ ಬಾಕಿಲ್ ದೆಪ್ಪುಜಲ್.

"ಕುಲ್ಲೊಡ ಪೋವೊಡ? ಪನ್ ಮಂಗಣೆ" ಪಂಡ್ ಬಲ್ಲಾಳೆ ಕೇನುವೆ.

"ಕುಲ್ಲುಂಡ ಕುಲ್ಲೊಲಿಯೆ. ಪೋಪುಂಡ ಪೋವೊಲಿ" ಪನ್ನಲ್ ಮಂಗಣೆ.

"ಬಾಕಿಲ್ ದೆಪ್ಪು ಮಂಗಣೆ. ಎನ್ನಡ ಲತ್ತ್ ಬಚ್ಚಿರೆ, ಎಲ್ಲು ಬಜ್ಜೆಯಿದ ಪೂಲು, ಬೆಣ್ಣೆ ಸುಣ್ಣು, ಕಟ್ಟಾದ ಪುಗೆರೆ ಉಂಡು. ನಮ ಒಟ್ಟುಗು ಕುಲ್ಲುದು ಬಚ್ಚಿರೆ ತಿನ್ನ"

"ಬಾಡ್ ದಿನ ಬಚ್ಚಿರೆ, ಗೋಂಟು ಬಜ್ಜೆಯಿ, ನುಂಗುದಿನ ಸುಣ್ಣು, ತೊಟ್ಟು ಪುಗೆರೆ ಎನಡಲಾ ಉಂಡು" ಪನ್ನಲ್ ಮಂಗಣೆ.

ಒಂತೆ ಪೂರ್ತು ಕರಿಂಡ್. ಬಲ್ಲಾಳೆ ಕೊಟ್ಟಿದ ಪಿದಯಿ ಉಂತೊಂದೇ ಉಲ್ಲೆ.

"ಬಾಕಿಲ್ ದೆಪ್ಪು ಮಂಗಣೆ. ನಮ ಒಟ್ಟುಗು ಕುಲ್ಲುದು ಬಚ್ಚಿರೆ ತಿನ್ನ" ಬಲ್ಲಾಳೆ ಕುಡ ಕೇನುವೆ.

"ಯಾನ್ ಇರೆನ ಒಟ್ಟುಗು ಬಚ್ಚಿರೆ ತಿನಯೆ. ಎನ್ನ ಕಂಡನಿ ಬರೊಡು. ಯಾನ್ ಅಯನ ಕೈತಲ್ ಕುಲ್ಲುದು ಬಚ್ಚಿರೆ ತಿನೊಡು" ಪನ್ನಲ್ ಪರತಿ ಮಂಗಣೆ.

ಪರತಿ ಮಂಗಣೆ ಬಾಕಿಲ್ ದೆಪ್ಪುಜಲ್. ಬಲ್ಲಾಳೆ ಮಸ್ತ್ ಪೂರ್ತು ಕಾಪುವೆ.
"ನಿನ್ನ ಕಂಡನಿ ಬತ್ತಿಸಾತಿಗೆ ಬೂಡುಗು ಬರೈರೆ ಪನ್ನ" ಪಂಡ್‌ದ್ ಪೋಪೆ.
ಒಂತೆ ಪೂರ್ತು ಆನಗ ಪರವೆ ಮೈಂದೆ ಬರ್ಪೆ. ತುಂಬುದಿ ಪಾಲೆದ ಕಟ್ಬಾನ್
ಕಿದೆಕ್ ಪಾಡುವೆ.

ಪರವನ ಸ್ವರ ಕೇಂಡಿನೆ ಪರತಿ ಬಾಕಿಲ್ ದೆಪ್ಪುವಲ್. ಪಿದಯಿ ಬರ್ಪಲ್. ಪರವಗ್
ಕೈಕಾರ್ ದೆಕ್ಕರೆ ನೀರ್ ಕೊರ್ಪಲ್.

ಪರವೆ ಕೈಕಾರ್ ದೆಕ್ಕದ್ ಉಲಯಿ ಬರ್ಪೆ. ಮಣೆ ದೀದ್ ವಣಿಸ್‌ಗ್ ಕುಲ್ಲುವೆ.

ಪರತಿ ಕಂಡನೆಗ್ ಮಣ್ಣ್‌ದ ಗದ್ದವುಡು ಗಂಜಿ ಬಳಸುವಲ್. ಉಪ್ಪು ನೀರ್‌ಡ್
ಪಾಡಿನ ರಚ್ಚೆ, ಪೆಜಕ್ಕಾಯಿನ್ ಕಿನ್ನಿ ಗದ್ದಾವುಡು ಪಾಡುವಲ್. ಕಂಡನೆನ ಎದುರು ದೀಪಲ್.

ಪರವೆ ಗಂಜಿ ಉನ್ನೆ. ಬಚ್ಚಿರೆ ಪೂಲು ಬಾಯಿಗ್ ಪಾಡುವೆ. ಅಗ್ಗೊಂದು ಕುಲ್ಲುವೆ.

ಪರತಿ ಮಂಗಣೆಲಾ ಕಂಡನೆನ ಕೈತಲ್ ಕುಲ್ಲುವಲ್. ಅಯೆ ಕೊರಿನ ಪೂಲು
ಬಚ್ಚಿರೆನ್ ಬಾಯಿಗ್ ಪಾಡ್ ಅಗ್ಗಿವಲ್.

"ಇನಿ ಬಲ್ಲಾಳೆರ್ ಕೊಟ್ಟಿಗ್ ಬತ್ತದಿತ್ತೆರ್. ನಿನನ್ ಬೂಡುಗು ಲೆಯ್‌ದ್"
ಪಂಡಲ್ ಪರತಿ ಮಂಗಣೆ.

ಪರವೆ ಮೈಂದೆ ಲಕ್ಕಿಯೆ. ತುತ್ತಿ ಕುಂಟುನು ಮಾತ್‌ದ್ ಕುಡ್ಡುದು ತುತ್ತಿಯೆ.
ಎಲತ್ತೊನು ಪುಗಲ್‌ಗ್ ಪಾಡೊಂಡೆ. ಬಲ್ಲಾಳೆರೆ ಬೂಡುದ ಕಡೆಕ್ ಬತ್ತೆ.

ಬಲ್ಲಾಳೆರ್ ಮಧ್ಯಾಹ್ನದ ವಣಿಸ್ ಆದ್ ತೂಗು ಮಂಚೊಡು ಕುಲ್ಲೊಂದು
ಬಚ್ಚಿರೆ ಅಗ್ಗೊಂದಿತ್ತೆರ್.

ಪರವೆ ಮೈಂದೆ ಜಾಲಾದ ಒಂಜಿ ಮೂಲೆಡ್ ಉಂತಿಯೆ. "ಅಡ್ಡ ಬೂರಿಯೆ
ದನಿಕುಲೆ" ಪಂಡ್‌ದ್ ಕೈ ದೆರ್ತದ್ ಸೊಂಟ ಬಗ್ಗಾದ್ ನಮಸ್ಕಾರ ಮಲ್ತೆ.

ಬಲ್ಲಾಳೆ ಬಚ್ಚಿರೆದ ಅಗ್ಗಿನ್ ಪಡ್ಚೊಗು ಉಬ್ಬಿಯೆ. ಪರವನೇ ಒಂಜಿ ಗಳಿಗೆ
ತೂಯೆ.

"ಬೂಡುಗು ಬರೈರೆ ಅಪ್ಪಣೆ ಕೊರ್ತೆರ್‌ಗೆ. ಎನಡ್ ದಾನೆ ಸೇವೆ ಆವೊಡು"
ಪಂಡ್‌ದ್ ಪರವೆ ತರೆ ಬಗ್ಗಾದ್ ಕೇಂಡೆ.



"ಅಂಗಾರೆದಾನಿ ಸಿಂಗಬಾರೆದ ಕೈಲ್ ಕಡ್ವೆರುಂಡು. ಬೊಟ್ಟಪ್ಪಾಡಿ ಬೂಡುಡು ಪೊಸ ಬೂತೊಗು ನೇಮ ಉಂಡು. ಬೂತೊಗು ಕಟ್ಟಿಯೆರೆ ಈ ಬರೊಡು" ಪನ್ನೆ ಬಲ್ಲಾಳೆ.

ಪರವೆ ತನ್ನ ಕೊಟ್ಟುಗ್ ಪಿರ ಬರ್ಪೆ.

'ದಾಯೆ ಲೆತ್ತೆರ್ ಬಲ್ಲಾಳೆರ್' ಪರತಿ ಕೇಂಡಲ್.

"ಅಂಗಾರೆದಾನಿ ಸಿಂಗಬಾರೆದ ಕೈಲ್ ಕಡ್ವೆರುಂಡುಗೆ. ಬೊಟ್ಟಪ್ಪಾಡಿ ಬೂಡುಡು ಪೊಸ ಬೂತೊಗು ನೇಮ ಉಂಡುಗೆ. ಬೂತ ಕಟ್ಟಿಯೆರೆ ಯಾನ್ ಪೋವೊಡುಗೆ"

ಪರವ ಮೈಂದನ ಪಾತೆರ ಪರತಿ ಕೇಂಡಲ್. ಪೋಡಿದ್ ಅಲ್ಕಾದ್ ಬೂರಿಯಲ್. "ಸಮಯದಾಂತಿ ಸಮಯೊಗು ಈ ನೇಮ ದಾಯೆ? ಇಂದೆಟ್ ದಾದನಾ ಕಪಟ ಉಂಡು" ಪನ್ನಿನ ಪಾತೆರ ಅಲೆಗ್ ತೆರಿಂಡ್. ದುಂಬು ಬದ್ವಿನ ಆಪೊತ್ತುದ ಚಿತ್ರ ಅಲೆನ ಕಣ್ಣೆದ ಎದುರು ಬತ್ತಂಡ್.

ಪರತಿ ಮಂಗಣೆನ ವೋನೆ ಬಾಡ್ಂಡ್. ಕಣ್ಣೆಡ್ ಕಡು ದುಃಖ ತೋಜಿಂಡ್.

"ದಾನೆ ಮಂಗಣೆ? ನಿನ್ನ ವೋನೆ ದಾಯೆ ಬಾಡ್ಡೆಂಡ್? ದಾಯೆ ಕಣ್ಣೆಡ್ ಕಡು ದುಃಖ ದೆತೊಂದುಲ್ಲ? ನಿನ್ನ ಈ ದುಃಖೊಗು ದಾದ ಕಾರಣ" ಪರವೆ ಕೇನುವೆ.

"ಎಲ್ಲು ಪ್ರಾಯೊಡು ಇರೆನ ಕೈಪತ್ತಾದ್ ಈ ಇಲ್ಲ ಪೊಗ್ಗಿಯೆ. ಇನಿಕ್ ಎಂಕ್ಲೆ ಬದ್ಡೆಕ್ ಮುಗಿಯೊಂದು ಬತ್ತಂಡ್"

"ಬಲ್ಲಾಳೆರೆನ ಇಲ್ಲಡ್ ಪೊಸ ಬೂತೊಗು ನೇಮ ಉಂಡು ಪಂಡರತ್ತಾ? ಐಡ್ಲೆ ದುಂಬು ಎಂಕುಲು ಎನ್ನ ಅಪ್ಪೆ ಅಮ್ಮನ ಇಲ್ಲಡೆ ಪೋದು ಬರೊಡು" ಪನ್ನಲ್ ಪರತಿ ಮಂಗಣೆ.

"ಆವು. ಐಕ್ ದಾನೊಡು. ಎಲ್ಲೆನೆ ಪಿದಾಡ್‌ಗ" ಪನ್ನೆ ಪರವೆ.

ಮನದಾನಿ ಪುಲ್ಲು ಕಾಂಡೆ. ಪರತಿ ಮಂಗಣೆ ಬೇಗ ಲಕ್ಕಲ್. ಇಲ್ಲ ಜಾಲ್ ಅಡ್ಡಲ್. ತಾನ್ ಗಂಜಿ ಉಂಡಲ್. ಕಂಡನೆಗಾಲಾ ಗಂಜಿ ಬಲಸ್ಯಲ್.

ಇವೆರ್ಲಾ ಗಂಜಿ ಉಂಡೆರ್. ಪರತಿ ಮಂಗಣೆನ ಅಪ್ಪೆ ಇಲ್ಲಗ್ ಪಿದಾಡಿಯೆರ್.

ಪರತಿ ಮಂಗಣೆನ ಅಪ್ಪೆ ಅಮ್ಮೆ ಅಪರೂಪೊಡು ಬತ್ತಿನ ಮಗಲೆನ್, ಮರ್ಮಯನ್ ತೂಯೆರೆ. ಅಕ್ಕೆಗ್ ಬಾರಿ ಕುಸಿ ಆಂಡ್.

ಬತ್ತಿನಕ್ಕೆಗ್ ಕಾರ್‌ಗ್ ನೀರ್ ಕೊರಿಯೆರ್. ಅಸರ್‌ಗ್ ಬೆಲ್ಲ ನೀರ್ ಕೊರಿಯೆರ್.

"ದಾನೆ ಬತ್ತರ್ ಮಗಾ. ಕೆಲಸೊಡು ಬತ್ತರಾ? ಇಂಚೆನೇ ಬತ್ತರಾ?" ಪರತಿ ಮಂಗಳೆನ ಅಪ್ಪೆ ಮಗಲೆಡ ಕೇಂಡಲ್.

"ನಿಕ್ಲೆನ್ ತೂದು ಪೋಯಿ ಪಂಡ್‌ದ್ ಬತ್ತ. ಬೊಟ್ಟಪ್ಪಾಡಿ ಬಳ್ಳಾಲೆರೆ ಬೂಡುಡು ಪೊಸ ಬೂತೊಗು ನೇಮ ಉಂಡು. ಅಂಗಾರೆದಾನಿ ಬಾರೆದ ಕೈಲ್ ಕಡ್ಪುವೆರ್. ಕೋಲ ಕಟ್ಟೆರೆ ಮೆರೆಗ್ ಅಪ್ಪಣೆ ಆತ್‌ಂಡ್. ಐಡ್ನ್ ದುಂಬು ಒರ ನಿಕ್‌ಲೆನ್ ತೂದು ಪೋಯಿ ಪಂಡ್‌ದ್ ಬತ್ತ" ಪಂಡಲ್ ಪರತಿ ಮಂಗಳೆ.

ಅಪ್ಪೆ ಮಗಲೆಗ್, ಮರ್ಮಯಗ್ ಗಡ್ಡದ ತಮ್ಮನ ಪಾಡೊಡು ಪಂಡ್‌ದ್ ನೆಂತಲ್. ಮಲ್ಲ ಕಪ್ಪುದ ಕಟ್ಟಿದ ಕೋರಿ ಕೆರಿಯಲ್. ಅರಿತ ಅಡ್ಡೆ ಮಲ್ತಲ್. ಮೋಕೆಡ್ ಮಗಲೆನ್, ಮರ್ಮಯನ್ ಉಣ್ಣಾಯಲ್.

ರಡ್ಡ ದಿನ ಪರತಿ ಮಂಗಳೆ ಅಪ್ಪೆ ಅಮ್ಮನೊಟ್ಟುಗು ಸಂತೋಸೊಡು ಇತ್ತಲ್. ಪಿದಾಡುನ ಗಳಿಗೆ ಬತ್ತಂಡ್. ಕಂಡನಿ ಬುಡೆದಿ ಇರ್ವೆರ್‌ಲಾ ಅಪ್ಪೆ ಅಮ್ಮನ ಕಾರ್ ಪತ್ತಿಯೆರ್. ಪರತಿನ ಕಣ್ಣೆಡ್ ಕಣ್ಣ ನೀರ್ ಅರಿಂಡ್. ಅಪ್ಪೆನ್ ಅರಾದ್ ಪತ್ತೆದ್ ಬುಲಿಪುವಲ್.

"ಯಾಪಲಾ ತೆಲ್ಲೊಂದು ನೆಲ್ಲೊಂದು ಉಪ್ಪುವ. ಇನಿ ದಾಯೆ ಬುಲಿಪುವ ಮಗಾ? ನಿನ್ನ ಕಣ್ಣ ಕೊಡಿಟ್ ಕಣ್ಣ ನೀರ್‌ದ ಪನಿ ದಾಯೆ?" ಪಂಡ್‌ದ್ ಅಪ್ಪೆ ಕೇನುವಲ್.

"ನಿಕ್ಲೆನ್ ತೂಪಿನ ಭಾಗ್ಯ ನನ ಉಂಡಾ ಇಚ್ಚಾ. ಅವೆನ್ ನೆಂತೆದ್ ದುಃಖ ಬತ್ತಂಡ್" ಪಂಡಲ್ ಪರತಿ ಮಂಗಳೆ.

"ಬೊಡ್ಡಾಯಿನೆನ್ ದಾಯೆ ಪಾತೆರುವ ಮಗಾ? ಇನಿ ನಿಕ್ಕ್ ದಾದ ಆತ್‌ಂಡ್. ಯಾಪಲಾ ತೆಲ್ಲೊಂದು ನೆಲ್ಲೊಂದು ಪೋಪಿನಾಲ್ ಇನಿ ದಾಯೆ ಬುಲೊಂದುಲ್ಲ?" ಅಪ್ಪೆ ಪರತಿನ ತರೆಪೂಜಿದ್ ಕೇನುವಲ್.

ಪರತಿ ಕಣ್ಣೆಡ್ ಕಣ್ಣ ನೀರ್‌ನ್ ಸೆರಂಗ್‌ಡ್ ಒಚ್ಚುವಲ್. "ಎಂಕುಲು ಪೋಪ" ಪಂಡ್‌ದ್ ಕಂಡನಿ ಬೊಡೆದಿ ಪಿದಾಡುವೆರ್. ಕೊಟ್ಟಿಗ್ ಬರ್ಪೆರ್. ಪರತಿ ಮಂಗಳೆ ಪರವನೇ ತೂಪಲ್. ಅಲೆಗ್ ಅಯನ ಮಿತ್ತ್ ಇತ್ತಿನ ಪಿರ್ತಿ ಉರ್ಕರುಂಡು. ಅಯನ ಪುಗಲ್ ತರೆ ದೀದ್ ಕಣ್ಣ ನೀರ್ ದೆಪ್ಪುವಲ್.

"ಪರತಿ ಮಂಗಳೆ ದಾಯೆ ಇಂಚ ಮಲ್ಪುವಲ್" ಪಂಡ್‌ದ್ ಪರವೆ ಮೈಂದಗ್ ಆಚಿರ ಆಪುಂಡು. ಅಲೆನ ಕಣ್ಣ ನೀರ್ ಒರೆಸುವೆ. ಸಮಾಧಾನ ಮಲ್ಪುವೆ.

ಕೋಲದ ದಿನ. ಪರವೆ ಮೈಂದೆ ಕುರುವೆಡ್ ಬೂತೊದ ದುತ್ತೆತೊ ಜಿಂಜಾಯೆ. ಗಂಜಿ ಉಂಡೆ. ಪರವೆ ಮಂಗಳೆ ತಾನ್ ಉಂಡಲ್. ಪುಚ್ಚೆ ನಾಯಿಗ್ ಗಂಜಿ ಪಾಡ್ಯಲ್. ಪರವೆ ತೆಂಬರೆ ದೋಲುನು ಬೆರಿಕ್ ಪಾಡೊಂದು ಪೋಯೆ. ಮಂಗಳೆ ಕೊಟ್ಟಿಗ್ ಬಾಕಿಲ್ ಪಾಡ್ಯಲ್. ಕುರುವೆನ್ ತರೆಟ್ ದೀಯಲ್. ಪರವನ ಬೆರಿಯೆ ಪೋಯಲ್.



ಪರವೆ ಮೈಂದೆ ಬೊಕ್ಕ ಪರತಿ ಮಂಗಣೆ ಬರೊಂದುಪ್ಪುನೆನ್ ಬಲ್ಲಾಳೆ ದೂರೊಡು ತೂಯೆ. ಅಯನ ಮೋನೆಡ್ ಮುಗುಡು ತೆಲಿಕೆ ಇತ್ತ್ಂಡ್.

ಪರವೆ ತಗ್ಗದ ನೆಲ ತೂದು ಉಂತಿಯೆ. ಪತ್ತ್ ಬಿರೆಲ್‌ನ್ ಒಂಜಿ ಮಲ್ತಾದ್ ನಮಸ್ಕಾರ ಮಲ್ತೆ.

"ಬತ್ತನ? ದುಂಬುದ ಕೆಲಸ ಸುರು ಮಲ್ಪು" ಪರವಗ್ ಬಲ್ಲಾಳೆ ಅಪ್ಪಣೆ ಕೊರಿಯೆ.

ಪರವೆ ಮೈಂದೆ ಪರತಿ ಮಂಗಣೆನ್ ತೂಯೆ. ಆಲ್ ಬೆಪ್ಪು ಕಟ್ಟಾದ ಒಂಜಿ ಕಡೆಟ್ ಉಂತೊಂದಿತ್ತಲ್.

"ದಾದ ತೂಪ ಪರತಿ ಮಂಗಣೆ. ಯಾನಿತ್ತೆ ಬೂತೊಗು ಅಣಿ ಕಟ್ಟುವೆ. ಈ ಪೂ ಕೊಯ್ಲಾ ಕನ" ಪರವೆ ಪರತಿಡ ಪಂಡೆ.

ಪರವೆ ಪಾಲೆಡ್ ಅಣಿ ಕಟ್ಟುವೆ. ಪರತಿ ಮಂಗಣೆ ಕೇಪುಲ ಬೊಕ್ಕ ಕಿಸಗಾರ ಪುರ್ಪೊಲೆನ್ ಕೊಯ್ಲಾ ಕನಪಲ್.

ಪರವನ ಕೈತಲ್ ಕುಲ್ಲುವಲ್ ಮಂಗಣೆ. ಪೂತ ಮಾಲೆ ಕಟ್ಟುವಲ್.

ಬಲ್ಲಾಳೆ ಅವುಲೇ ಉಂತೊಂದು ತೂವೊಂದುಲ್ಲೆ.

"ದಾದ ತೂಪರ್ ಬಲ್ಲಾಳೆರೆ. ಸಮಯ ಕರಿಯೊಂದುಂಡು. ಪೂರ್ತು ಕಳೆವೊಂದುಂಡು. ಬೂತದ ಏಸ ಪಾಡೆರೆ ಎಣ್ಣೆ ಪತ್ತೊಡು. ಮೀಯೆರೆ ಪೋವೊಡು"

ಬಲ್ಲಾಳೆ ಪರವನ ಪಾತೆರ ಕೇಂಡೆ. ಕಂಚಿದ ದೀಪ ಪೊತ್ತಾಯೆ. ಗಿಂಡಿಗ್ ಎಣ್ಣೆ ಪಾಡಿಯೆ. ಕೊಡಿಟ್ ವೀಳ್ಕ ದೀಯೆ. ಪರವಗ್ ಬೂತೊದ ಎಣ್ಣೆ ಕೊರಿಯೆ.

ಅಂಗೈಗ್ ಮೈತಿನ ಎಣ್ಣೆನ್ "ಸ್ವಾಮಿ ದೇವೆರೆ" ಪಂಡ್‌ದ್ ಪರವೆ ಆಪೋಶನ ಮಲ್ಪುವೆ.

ಪಾದೊಗು ಮೂಜಿ ಪನಿ ಎಣ್ಣೆ ಮುಟ್ಟಾವೆ. ನೆತ್ತಿಗ್ ಮೂಜಿ ಪನಿ ಎಣ್ಣೆ ದೀಪೆ. ಎಣ್ಣೆದ ಗಿಂಡಿನ್ ಪರತಿ ಮಂಗಣೆಡ ಕೊರ್ಪೆ.


ಪರವೆ ಮೀದ್ ಬರ್ಪೆ. ಮೋನೆಗ್ ಅರದಾಳ ಪೂಜೆರೆ ಕುಲ್ಲುವೆ, ಅರದಾಳ ಪೂಜಿದ್ ಆಯಿನೆ ಲಕ್ಕಾದ್ ಉಂತುವೆ. ಕಾರ್‌ಗ್ ಗಗ್ಗರ ಕಟ್ಟುವೆ. ಮೈಕ್ ಅಣಿ ಕಟ್ಟುವೆ.

ಪರತಿ ಮಂಗಣೆ ತೆಂಬರೆ ಬೊಟ್ಟುವಲ್. ನುಡಿ ಪನ್ನಲ್. ಬೂತೊದ ವೇಷೊಡು ಪರವೆ ಮೈಂದೆ ನಲಿಪುವೆ. ವಾದ್ಯದಕ್ಕೆನ ಉಲಿಪಾಟೊಗು ಸರಿಯಾದ್ ಪಜ್ಜೆ ಪಾಡುವೆ. ಉಲಿಪಾಟಿಗೆದ ಸ್ವರ ಎಚ್ಚ ಆಯಿಲೆಕ್ಕ ಅಯಗ್ ದರ್ಸನ ಬರ್ಪುಂಡು. ಅರಬಾಯಿ ದೀವೊಂದು ಎದುರು ಪಿರವು ಪಾರುವೆ. ಕಾರ್‌ಗ್ ಕಟ್ಟಿನ ಗಗ್ಗರದ ಸ್ವರ ಜೋರಾದ್ ಕೇನುಂಡು.

ಬಲ್ಲಾಳೇ ಪರವನ ನಲಿಪಾಟಿಗೆ ತೂಪೆ. ಮುಗುರು ತೆಲಿಕೆ ತೆಲಿಪುವೆ.

ಬಲ್ಲಾಳೆ ಬೂಡುದ ಮಾಳಿಗೆ ಮಿತಾರುವೆ. ಗಿಳಿ ಬಾಕಿಲ್ಲಾ ದೀತಿನ ಜೋಡು ನಳಿಗದ ಬೆಡಿ ದೆಪ್ಪುವೆ. ಪರವೆ ನಲ್ಲೊಂದು ನಲ್ಲೊಂದು ಬನ್ನಗ ಬೆಡಿ ದೀದ್ ಅಯನ್ ಕೆರ್ಪೆ.

- ಸೀತಕ್ಕ : ಓ... ಉಂಬೆನಾ...? ಇಂಚಿತ್ತಿ ಮಾನ ಕೆಟ್ಟಿನ ಕೆಲಸ ಅಯೆ ಮಲ್ಲೊಲಿಯ?
- ರಾಮಕ್ಕ : ಪೊಣ್ಣುಲೆ ಮರ್ಲೆರೆಗ್ ಒವು ಎಡ್ಡೆ ಒವು ಪಡಿಕೆ ಪನ್ನಿನ ಅಕಲೇ ಉಪ್ಪುಜಿಗೆ.
- ಸೀತಕ್ಕ : ಪರತಿ ಮಂಗಣೆ ಇಂದೆನ್ ಪೂರಾ ತೂವೊಂದಿತ್ತಲಾ?
- ಸೇಸಕ್ಕ : ಬಲ್ಲಾಳೆ ಇಂಚಿತ್ತಿ ಕಂಡು ಕೆಲಸ ಮಲ್ಪುವೆ ಪನ್ನಿನ ಸಂಸಯ ಅಲೆಗ್ ದುಂಬೇ ಇತ್ತಂಡ್.
- ರಾಮಕ್ಕ : ಪಾಪ. ಪರತಿ ಮಂಗಣೆನ ಅವಸ್ಥೆ ಎಂಚ ಆದುವು?
- ಸೇಸಕ್ಕ : ಪರತಿ ಮಂಗಣೆ ಬೊಬ್ಬ ಪಾಡುವಲ್. "ಅಯ್ಯೋ ಬಲ್ಲಾಳೆರೆ, ಎನ್ನ ಕಂಡನೆನ್ ಕೆಯರತ್ತಾ" ಪಂಡ್ಡಾದ್ ಬುಲಿಪುವಲ್. ಕಂಡನೆನ ಪುನತ್ತ ಮಿತ್ತ್ ಬೂರುದು ಪೊರೆಲುವಲ್.
- ರಾಮಕ್ಕ : ಅವೆನ್ ಮಾತ ಉಂತುದು ತೂವೊಂದಿತ್ತೆನಾ ಆ ಬಲ್ಲಾಳೆ?
- ಸೀತಕ್ಕ : ಅವುಲು ಇತ್ತಿನ ಏರೆಗ್ಲಾ ಉಂಬೆನ ಕಂಡು ಕಪಟ ಗೊತ್ತಾಯಿಜಾ?
- ಸೇಸಕ್ಕ : ಏರೆಗ್ ಗೊತ್ತಾಂಡಲ ಅಕುಲು ದಾದ ಮಲ್ಪೆರೆ ಸಾದ್ಯ ಉಂಡು? ಪರತಿ ಮಂಗಣೆ ಬುಲಿಪುನೆನ್ ಬಲ್ಲಾಳೆ ತೂಪೆ. ಅಲೆನ ಕೈತಲ್ ಬರ್ಪೆ. "ಪರತಿ ಮಂಗಣೆ. ನಿನ್ನ ಕಂಡನೆ ಸೈತೆ ಪಂಡ್ಡಾದ್ ಬುಲಿಪಡ. ನಿನನ್ ಯಾನ್ ಬುಡ್ಡು ಪಾಡಯೆ. ಎನ್ನ ಸಾರ ಮುಡಿತ ಅರಿತ ಆಸ್ತಿ ನಿಕ್ಕ ಕೊರ್ಪೆ. ಪೋಡ್ಯಡ" ಪನ್ನೆ.
- ರಾಮಕ್ಕ : ಕಂಡನಿಯೇ ಸೈತೆಗೆ. ಉಂಬೆನ ಸಾರ ಮುಡಿತ ಆಸ್ತಿ ಏರೆಗ್ ಬೋಡು?
- ಸೀತಕ್ಕ : ಪರತಿ ಮಂಗಣೆಗ್ ಬಲ್ಲಾಳನ ಪಾತೆರ ಕೇಂಡ್ಡಾದ್ ಗೆಂಡದಂಚಿನ ಕೋಪ ಬರುವು. ಅತ್ತಾ?
- ಸೇಸಕ್ಕ : ಆಲ್ ಪೂರಾ ದುಕ್ಕೊನು ಮನಸ್ದುಲಯಿ ನಿಂಗಿಯಲ್. ಕಣ್ಣ ನೀರ್ ಒರೆಸಿಯಲ್.
- ರಾಮಕ್ಕ : ಪಂಡ...? ಬಲ್ಲಾಳನ ಪಾತೆರೊನು ಒತ್ತೊಂಡಲಾ?
- ಸೇಸಕ್ಕ : ಛಿ: ಎಂಚಿನ ಪನ್ನಯ ರಾಮಕ್ಕ? ಆಲ್ ಅಂಚಿನ ಪೊಣ್ಣು ಅತ್ತ ಪಂಡ್ಡಾದ್ ಯಾನ್ ದುಂಬೇ ಪಂಡೆ ಅತ್ತ? ಆತ್ ಮಲ್ಲ ಬಲ್ಲಾಳಡ ಕೋಪ ತೋಜಾದ್ ಈ ಪಾಪದ ಪೊಣ್ಣು ಬದ್ಕೆರೆ ಉಂಡ? ಆಲ್ ಮನಸ್ದ ಉಲಯೇ ಒಂಚಿ ನಿರ್ದಾರೊಗು ಬತ್ತಲ್.



- ಸೀತಕ್ಕ : ದಾದ ನಿರ್ದಾರೊಗು ಬತ್ತಲ್?
- ಸೇಸಕ್ಕ : ಬಲ್ಲಾಳನ್ ಎದುರು ಪಾಡಂದೆ ವೋಸೊಡೇ ಅಯನ್ ಮುಗಿಪೊಡು ಪನ್ನಿನ ನಿರ್ದಾರ ಮಲ್ತಲ್.
- ರಾಮಕ್ಕ : ಪೊಣ್ಣು ಪಂಡಂಡ ಪರತಿ ಮಂಗಣೆ.
- ಸೀತಕ್ಕ : ಬೊಕ್ಕ ದಾದ ಆಂಡ್?
- ಸೇಸಕ್ಕ : ಬಲ್ಲಾಳಗ್ ಅಮಸರ. ಕಂಡನೆ ಸೈತೆ. ನನ ಆಲ್ ಎನ್ನಾಲ್ ಆಪಲ್ ಪನ್ನಿನ ನಂಬೊಲಿಕೆ.

ಆಂಡ ಪರತಿ ಮಂಗಣೆ ತರೆ ತಗ್ಗಾದ್ ಬುಲೊಂದುಲ್ಲಲ್. "ನನಲಾ ದಾಯೆ ಕಾಪಾವ ಮಂಗಣೆ. ನಿನ್ನ ಕಂಡನಿ ಸೈತೆ. ನನ ನಿಕ್ಕ ಯಾನೇ ಗತಿ. ಲಕ್ಕ, ಕಣ್ಣದ ಕಣ್ಣೇರ್ ಒರೆಸ್. ಬಲ ನಮ ಎನ್ನ ಬೂಡುದ ಮಾಳಿಗೇಗ್ ಪೋಯಿ" ಪಂಡೆ ಬಲ್ಲಾಳೆ.

ಪರತಿ ಮಂಗಣೆ ತರೆ ದೆರ್ತಾದ್ ಬಲ್ಲಾಳನ್ ತೂಪಲ್.

"ಬಲ್ಲಾಳೆರೆ ಕೈಪತ್ತಿ ದೋಸೊಗು, ವೈಮುಟ್ಟಿ ಪಾಪೊಗು ಪರವನ ಪುಣೊನು ಪೊತ್ತಾದ್ ಒಂಜಿ ಪುಂಡಿ ಬೊಣ್ಣು ಮಲ್ಪೊಡು. ಐಕ್ ಈರ್ ಎಂಕ್ ಸಾಯ ಮಲ್ಪೊಡು" ಪನ್ನಲ್ ಪರತಿ ಮಂಗಣೆ.

"ನಿಕ್ಕ ಬೋಡಾದ್ ಯಾನ್ ದಾದ ಮಲ್ಪೆರೆಲಾ ತಯಾರ್. ಪನ್, ಯಾನ್ ದಾದ ಮಲ್ಪೊಡು" ಬಲ್ಲಾಳೆ ಕೇನುವೆ.

"ಪರವಗ್ ಇರೆನ ಬಾಕಿಮಾರ್ ಕಂಡೊಡು ಕಾಟ ಗೂರೊಡು. ಇರೆನ ಜಾಗೆದ ಈ ಕೆರೆಟತ್ತಿನ ಕುಕ್ಕುದ ಮರ ಕಟ್ಟೊಡು. ಆ ಕೆರೆತ ಬರಿಯಿತ್ತಿನ ಪೆಲತ ಮರೊನು ಕಟ್ಟೊಡು. ಮಾತಾ ಮರೊಕುಲೆನ್ ಒಟ್ಟು ದೀದ್ ಪರವಗ್ ಕಾಟ ಗೂರೊಡು" ಪನ್ನಲ್ ಮಂಗಣೆ.

ಬಲ್ಲಾಳೆ ಕೆಲಸದಕಾಲೆನ್ ಲೆಪ್ಪುವೆ. ಆ ಕೆರೆತ ಬರಿತ ಕುಕ್ಕುದ ಮರ ಕಟ್ಟಾವೆ. ಈ ಕೆರೆತ ಬರಿತ ಪೆಲತ ಮರ ಕಟ್ಟಾವೆ. ತನ್ನ ಬಾಕಿಮಾರ್ ಕಂಡೊಡು ಪರವನ ಪುನ ಪೊತ್ತಾಯರೆ ತಯಾರ್ ಮಲ್ಪುವೆ.

"ಆಂಡತ್ತ. ನನ ಬಲ. ಬೂಡುದ ಮಾಳಿಗೇಗ್ ಪೋಯಿ" ಪನ್ನೆ ಬಲ್ಲಾಳೆ.

"ಬಲ್ಲಾಳೆರೆ ಎನ್ನ ಪರವನ್ ಬೆಚ್ಚ ನೀರ್ಡ್ ಮೀಪಾವೊಡುಜೋಡು ಮಂಡೆಡ್ ನೀರ್ ಬೆಚ್ಚಾವಡ್. ಪೂಜೆರೆ ಎಣ್ಣೆ ತಯಾರಾವಡ್" ಪನ್ನಲ್ ಪರತಿ ಮಂಗಣೆ.

ಬಲ್ಲಾಳೆ ಮಲ್ಲ ಮಲ್ಲ ಜೋಡು ಚೆಂಬುದ ಮಂಡೆನ್ ತರ್ಪಾವೆ. ನೀರ್ ಕಾಯ್ಪಾವೆ. ಪೂಜೆರೆ ಎಣ್ಣೆ ತಯಾರ್ ಮಲ್ಪುವೆ.

"ನನ ಬಲ. ಮಾಳಿಗೇಗ್ ಪೋಯಿ. ಪರವನ ಒರಿನ ಕೆಲಸೊನು ಎನ್ನ ಕೆಲಸದುಕುಲು ಮಲ್ಪುವೆರ್" ಪನ್ನೆ ಬಲ್ಲಾಳೆ.

"ಇಜ್ಜಿ ಬಲ್ಲಾಳೆರೆ. ಕೈಪತ್ತಿನ ದೋಸೊಗು, ಮೈಮುಟ್ಟಿನ ಪಾಪೊಗು ಪರವನ್ ಎನ್ನ ಕೈಟೇ ಮೀಪಾವೊಡು. ಬಲೆ ಅಯನ್ ಮೀಪಾಯೆರೆ ಎಂಕ್ ಸಾಯ ಮಲ್ಪುಲೆ. ಅಯನ ತರೆತ ಕಡೆಟ್ ಯಾನ್ ಪತೊನುವೆ. ಕಾರ್‌ದ ಕಡೆಟ್ ಈರ್ ಪತೊನುಲೆ. ಮೀಪಾಗ" ಪನ್ನಲ್ ಪರತಿ ಮಂಗಣೆ.

ಬಲ್ಲಾಳೆ ಪರವನ ಕಾರ್‌ದ ಕಡೆಟ್ ಪತ್ತುವೆ. ಪರತಿ ಮಂಗಣೆ ತರೆತ ಕಡೆಟ್ ಪತ್ತುವಲ್. ಪರವಗ್ ಮಂಜಲ್ ಸೀಗೆ ಪೂಜುವೆರ್. ಎಣ್ಣೆ ಮುಟ್ಟಾದ್ ಮೀಪಾವೆರ್.

"ಆಂಡತ್ತ ಮಂಗಣೆ? ನನ ಬಲ. ನಮ ಪೋಯಿ" ಪನ್ನೆ ಬಲ್ಲಾಳೆ.


"ಎನ್ನ ಪರವಗ್ ಪಟ್ಟೆ ತುತ್ತಾವೊಡು. ಮುಂಡಾಸ್ ಕಟ್ಟೊಡು. ಈರ್ ತುತ್ತನ ಪಟ್ಟೆದ ಕುಂಟು ಕನಲೆ. ಈರ್ ತರೆಕ್ ಕಟ್ಟುನ ಮುಂಡಾಸ್ ಕನಲೆ. ಇರೆನ ಬೊಳ್ಳಿದ ಕಟ್ಟಾದ ಬಿಸತ್ತಿ ಕನಲೆ. ಬೊಳ್ಳಿದ ಕಟ್ಟಾದ ಬೆತ್ತ ಕನಲೆ. ಎನ್ನ ಪರವಗ್ ಇನಿ ಬಲ್ಲಾಳೆರೆ ದುತ್ತೆತ ಆವೊಡು" ಪನ್ನಲ್ ಪರತಿ ಮಂಗಣೆ.

ಬಲ್ಲಾಳೆ ಪಾರೊಂದು ಬೂಡುದ ಉಲಯಿ ಪೋಪೆ. ಪೆಟ್ಟಿಗಡ್ ಮಡ್ತ್ ದ್ವಿಯಿನ ತನ್ನ ಪಟ್ಟೆ ಕುಂಟುನು ದೆಪ್ಪುವೆ. ತರೆಕ್ ಕಟ್ಟುನ ಮುಂಡಾಸ್ ದೆಪ್ಪುವೆ. ಬೊಳ್ಳಿ ಕಟ್ಟಾದ ಬಿಸತ್ತಿ ದೆಪ್ಪುವೆ. ಬೊಳ್ಳಿ ಕಟ್ಟಾದ ಬೆತ್ತ ದೆಪ್ಪುವೆ. ಮಾತೆನ್ನಾ ಪತೊಂದು ಕಾಟದಡೆ ಬರ್ಪೆ.

ಪರತಿ ಮಂಗಣೆ ಬೊಕ್ಕ ಬಲ್ಲಾಳೆ ಪರವನ ಪುನೊಕು ಪಟ್ಟೆ ಕುಂಟು ತುತ್ತಾವೆರ್. ತರೆಕ್ ಮುಂಡಾಸ್ ದೀಪೆರ್.

"ಆಂಡತ್ತ ಮಂಗಣೆ. ನನ ದಾಯೆ ಪೊರ್ತು? ಬಲ ಪುಣೊನು ಕಾಟದ ಮಿತ್ತ್ ದೀಕ" ಪನ್ನೆ ಬಲ್ಲಾಳೆ.

"ಕಾಟ ದಗದಗ ಪೊತ್ತೊಡು. ಇರೆನ ಅಟ್ಟೊಡ್ಡತ್ತಿನ ನುಂಗೆಲ್ ತಾರಾಯಿ ಕಂತ್‌ದ್ ಕಾಟೊಗು ಪಾಡೊಡು" ಪನ್ನಲ್ ಮಂಗಣೆ.



ಬಲ್ಲಾಳೆ ಕೆಲಸದಯನ್ ಲೆಪ್ಪುವೆ. ಅಟ್ಟೊಡ್ತಿನ ನುಂಗೆಲ್ ತಾರಾಯಿನ್ ಕನಪಾವೆ.
ಅವೆನ್ ಕಾಟೊಗು ಪಾಡ್‌ಪಾವೆ.

"ನನ ದಾದ ತೂಪಿನಿ ಮಂಗಣೆ. ದುಂಬುದ ಕೆಲಸ ಮಲ್ತಾ ಮುಗಿಪುಗ" ಪನ್ನೆ
ಬಲ್ಲಾಳೆ.

"ಯಾನ್ ಮದಿಮಾಲೆ ದುತ್ತೆತೊ ಆವೊಡು. ಇರೆನ ಬೊಡೆದಿ ತುತ್ತನ ಪಟ್ಟೆ
ಸೀರೆ, ರವಕೆ ಕನಲೆ. ಕರಿಮಾಣಿ ಮೂಂಕುತಿ ಕನಲೆ. ಆಲ್ ದೀಪಿನ ಬಂಗಾರ್ ಪದ್ವೆ ಕನಲೆ.
ಯಾನ್ ಮುತ್ತೆದೆ ಅಲಂಕಾರ ಮಲ್ಪೊಡು. ಎನ್ನ ಪರವಗ್ ಮದಿಮಾಯೆ ಅಲಂಕಾರ ಆಯಿಲೆಕ್ಕ
ಎಂಕಲಾ ಮದಿಮಾಲೆ ಐತ ಆವೊಡು" ಪನ್ನಲ್ ಪರತಿ ಮಂಗಣೆ.

ಬಲ್ಲಾಳೆ ಬೂಡುದುಲಯಿ ಪೋಪೆ. ಬೊಡೆದಿನ ಪೆಟ್ಟಿಗೆದ ಬಾಯಿ ದೆಪ್ಪುವೆ.
ಅಲೆನ ದಾರೆದ ಸೀರೆ ದೆಪ್ಪುವೆ. ಬೊಡೆದಿನ ಕರಿಮಾಣಿ ಮೂಂಕುತಿ ಕನಪೆ. ಪರತಿ ಮಂಗಣೆನ
ಕೈಟ್ ಆ ವಸ್ತುಲೆನ್ ಕೊರ್ಪೆ.

ಪರತಿ ಬಲ್ಲಾಳನ ಬೊಡೆದಿನ ಪಟ್ಟೆ ಸೀರೆ ತುತ್ತವಲ್. ಅಲೆನ ಕರಿಮಾಣಿ ಮೂಂಕುತಿ
ದೀಪಲ್. ತರೆಬರ್ಚಿದ್ ಮುಡಿ ನಿಲಿಕ್ಕೆ ಪೂ ದೀಪಲ್. ಮುಂಡೊಗು ಕುಂಕುಮದ ಬೊಟ್ಟು
ಪಾಡುವಲ್. ಬಲ್ಲಾಳನ ಬೊಡೆದಿನ ಪದ್ವೆ ಬಂಗಾರ್ ದೀದ್ ಸಿಂಗಾರ ಮಲ್ಪುವಲ್.

ಮದಿಮಾಲೆ ಐತ ಆಯಿನ ಪರತಿ ಮಂಗಣೆನ ಪೂರ್ಲನು ಬಲ್ಲಾಳೆ ರೆಪ್ಪೆ ಮುಚ್ಚಂದೆ
ತೂಪೆ. ಅಲೆನ ಪೂರ್ಲ ಅಯನ ಆಸೆನ್ ಎಚ್ಚ ಮಲ್ಪುಂಡು.

"ನನ ದಾದ ತೂಪಿನಿ ಮಂಗಣೆ. ಬಲ, ಪುಣೊನು ಕಾಟೊಗು ದೀಕ" ಪನ್ನೆ
ಬಲ್ಲಾಳೆ.

ಪರತಿ ಮಂಗಣೆ ಮಟ್ಟೆಲ್ ತೂತ ಪೆಟ್ಟಿಗೆ ದೀವೊಂಡಲ್. "ಕಾರ್‌ದಲ್ಪ ಈರ್
ಪತ್ತಾಲೆ. ತರೆತಲ್ಪ ಯಾನ್ ಪತ್ತುವೆ" ಪನ್ನಲ್ ಮಂಗಣೆ.

ಬಲ್ಲಾಳೆ ಪರವನ ಪುಣತ ಕಾರ್‌ದಲ್ಪ ಪತ್ತಿಯೆ. ಪರತಿ ಮಂಗಣೆ ತರೆತಲ್ಪ
ಪತ್ತೊಂಡಲ್.

ಇರ್ವೆರ್‌ಲಾ ಕಾಟೊಗು ಮೂಜಿ ಸುತ್ತ ಬಲಿ ಬರ್ಪೆರ್. ಪರವನ ಪುಣೊನು
ಕಾಟದ ಮಿತ್ತಾ ದೀಪೆರ್.

ಪರತಿ ಮಂಗಣೆ ಕಾಟೊಗು ಕುಡ ಮೂಜಿ ಸುತ್ತು ಬರ್ಪಲ್. ಕುತ್ತಿ ಎಣ್ಣೆ, ಪೆತ್ತದ ನೈನ್ ಕಾಟೊಗು ಮೈಪುವಲ್. ತೂತ ಪೆಟ್ಟಿಗೆ ಮಟ್ಟೆಲ್ಲ್ ದೆಪ್ಪುವಲ್. ಕಡ್ಡಿ ಗೀರ್ದ್ ಕಾಟೊಗು ತೂ ಕೊರ್ಪಲ್.

"ಬಲ ಮಂಗಣೆ, ಎನ್ನ ಬೂಡುದ ಮಾಳಿಗೆಗ್ ಪೋಯಿ" ಪನ್ನೆ ಬಲ್ಲಾಳೆ.

"ಬಲ್ಲಾಳೆರೆ, ಇರೆನ ಬೂಡುಡುಪ್ಪುನ ಮಾತಾ ಬದ್ಕ ಬಾಗ್ಗೊನು ಕಾಟೊಗು ಪಾಡೊಡು. ಅಂಚಾಂಡ ಬರೈ" ಪನ್ನಲ್ ಪರತಿ ಮಂಗಣೆ.

ಒಂಜಿ ಗಳಿಗೆ ಬಲ್ಲಾಳೆ ದುಂಬು ಪಿರ ತೂಯೆ. "ಮಂಗಣೆ ಎನ್ನಲ್ ಆಪಿನಾಂಡ ಈ ಬದ್ಕ ಬಾಗ್ಗು ಪೋಂಡಲಾ ಮಲ್ಲೆಜ್ಜಿ" ಪಂಡ್‌ದ್ ನೆನಪುವೆ. ತನ್ನ ಬೂಡುಗು ಪೋಪೆ ಮಾತಾ ಬದ್ಕ ಬಾಗ್ಗೊಲೆನ್ ಕಂತ್‌ದ್ ಕಾಟೊಗು ಪಾಡುವೆ.

"ನನಾಂಡಲಾ ಎನ್ನ ಬೂಡುದ ಉಲಯಿ ಬಲ ಮಂಗಣೆ" ಪಂಡ್‌ದ್ ಬಲ್ಲಾಳೆ ಪನ್ನೆ.

ಪರತಿ ಮಂಗಣೆ ತನ್ನ ಕಂಡನೆನ ಕಾಟ ಪೊತ್ತುನೆನ್ ತೂಪಲ್. "ಎನ್ನ ಕಂಡನೆ ಎನ್ನನ್ ಬುಡ್ಡು ಪೋಯೆ. ನನ ಯಾನ್ ದಾಯೆ ಬದ್‌ಕುನು" ಪಂಡ್‌ದ್ ನೆನಪುವಲ್. ದಬಕ್ಕ ಕಾಟೊಗು ಲಾಗಿವಲ್.

ಉಂದೆನ್ ಬಲ್ಲಾಳೆ ತೂಪೆ. ಅಯಗ್ ಕಣ್ಣಾಗ್ ಕತ್ತಲೆ ಬತ್ತಿಲೆಕ್ಕ ಆಪುಂಡು. ನನ ಒಂಜಿ ಗಳಿಗೆಡ್ ಪರತಿ ಮಂಗಣೆ ಎನ್ನ ಕೈ ಸೇರುವಲ್. ಸುಕತ ಸ್ವರ್ಗನೇ ಎನ್ನ ಎದುರು ಕನಪಲ್ ಪಂಡ್‌ದ್ ನೆಂತಿನ ಬಲ್ಲಾಳಗ್ ಆಕಾಶನೇ ತರೆಕ್ ಬೂರಿಲೆಕ್ಕ ಆಪುಂಡು.

"ಯಾನ್ ಬಯಕಿನ ಪೊಣ್ಣು ಎಂಕ್ ತಿಕ್ಕಿಜಲ್. ಎನ್ನ ಪೂರಾ ಸಂಪೊತ್ತು ತೂತ ಪಾಲಾಂಡ್. ನನ ಯಾನ್ ದಾಯೆ ಬದುಕೊಡು" ಪಂಡ್‌ದ್ ನೆನಪುವೆ. ತಾನ್‌ಲಾ ಕಾಟೊಗು ಲಾಗಿವೆ.

ರಾಮಕ್ಕ : ಏತೊಂಜಿ ಪೊರ್ಲು ಕಂಟೊದ ಕತೆಯಾ ಸೇಸಕ್ಕ. ಪೊಣ್ಣು ಪಂಡ್‌ಂಡ ಪರತಿ ಮಂಗಣೆ. ಎಂಚಾಂಡಲ ಎಂಕ್ ಇನಿ ಆಟ ತೂವೊಡೆ.

ಸೀತಕ್ಕ : ಯಾನ್‌ಲ್ ಬರ್ಪೆಯಾ ರಾಮಕ್ಕ. ಒಂಜಿ ಆಟ ತೂದೇ ಬುಡ್ಡು.

ಸೇಸಕ್ಕ : ಯಾನ್‌ಲಾ ಬರ್ಪೆ. ಒಟ್ಟುಗು ಪೋಯಿ.

ಹೋರೈ ಗಾಡ್ ತುಳು ಕತೆಕುಲು

- | | | | |
|-----|--------------------------------|---|-----------------------------|
| 1. | ಕೋಟಿ - ಚೆನ್ನಯ | : | ಡಾ. ವಾಮನ ನಂದಾವರ |
| 2. | ಅಕ್ಕಿರಸು ಸಿರಿ | : | ಎ.ವಿ. ನಾವಡ |
| 3. | ಕೋಡ್ಲಬ್ಬು | : | ಡಾ. ಸುಶೀಲಾ ಉಪಾಧ್ಯಾಯ |
| 4. | ಪರತಿ ಮಂಗನೆ | : | ಕೆ. ಲೀಲಾವತಿ |
| 5. | ಪುಳೂರ ಬಾಚೆ | : | ವೆಂಕಟರಾಜ ಪುಣಂಚತ್ತಾಯ |
| 6. | ಅಬ್ಬಗೆ ದಾರಗೆ | : | ಕೆ.ಜೆ. ಶೆಟ್ಟಿ ಕಡಂದಲೆ |
| 7. | ಮೂಂಕು ಸಂಬಳೊ | : | ಡಾ. ಕೆ. ಚಿನ್ನಪ್ಪ ಗೌಡ |
| 8. | ಮಗೆ ಬರವು ಕಲ್ತೆ | : | ಕನರಾಡಿ ವಾದಿರಾಜ ಭಟ್ |
| 9. | ಮಾಯಂದಾಳ್ | : | ಯಶವಂತಿ ಸುವರ್ಣ |
| 10. | ಕಲ್ಲುರ್ತಿ ಕಲ್ಲುಡೆ | : | ಅಮೃತ ಸೋಮೇಶ್ವರ |
| 11. | ಬನ್ನಾಲ್ | : | ಶ್ಯಾಧರಿನ್ ರಾಡ್ರಿಗಸ್ |
| 12. | ಮಾಮಿ ಮರ್ಮಲ್ | : | ಡಾ. ಗಣನಾಥ ಶೆಟ್ಟಿ ಎಕ್ಕಾರು |
| 13. | ಜೋಗಿ ಪುರುಸೆರ್ | : | ಕುದ್ಯಾಡಿ ವಿಶ್ವನಾಥ ರೈ |
| 14. | ಅಗೋಳಿ ಮಂಜನೆ | : | ಗಣೇಶ ಅಮೀನ್ ಸಂಕಮಾರ್ |
| 15. | ಕಣ್ಣ್ಡ್ ತೂವಂದಿನ ಕೆಬಿಟ್ ಕೇನಂದಿನ | : | ಕೆ.ಆರ್. ರೈ |
| 16. | ದೇವು ಪೂಂಚೆ | : | ಅನಂತರಾಮ ಬಂಗಾಡಿ |
| 17. | ಮಾಯೊದ ಪೊಣ್ಣು | : | ಡಿ. ಯದುಪತಿ ಗೌಡ |
| 18. | ಅಜ್ಜಿ ಕತೆಕುಲು | : | ಡಾ. ಪುರುಷೋತ್ತಮ ಬಿಳಿಮಲೆ |
| 19. | ಅಪ್ಪೊದಡೈ | : | ಮುದ್ದು ಮೂಡುಬೆಳ್ಳೆ |
| 20. | ಭೂತಾಳ ಪಾಂಡೈ | : | ಡಾ. ಪಾಲ್ತಾಡಿ ರಾಮಕೃಷ್ಣ ಆಚಾರ್ |